

«Mes pled preferì è 'Katastrophe'»

Il «Plantahof» a Landquart è enconuscent sco scola da purs e puras. Las davosas tschintg emnas ha el dentant già ina altra funcziun. 86 giuvenils e giuvenilas da circa 14 onns da las vals dal sid dal Grischun e dal chantun Tessin èn sa participads/das ad in curs da tudestg durant lur vacanzas da stad. La FMR ha visità il «corso di tedesco».

LAURA SCHÜTZ/FMR

Ina veglia chanzun tudestga resuna tras in radio. Ils scolars e las scolaras taidlan concentradamain ed emprovan d'emplenir las largias sin lur fegl da lavur. L'organisatur dal curs *Adrian Luzi* declera ch'i saja il pli impurtant da promover lur abilitads da tadar e discurre. Il curs eria vegnì creà per promover l'integraziun da minoritads linguistics en il chantun Grischun. Al cumenzament vegniva quel era frequentà da giuvenils e giuvenilas da la lingua rumantscha, ils davos onns n'era l'interess da lezza vart dentant betg avant maun. En il fratemp è era glied dal Tessin bainvegnida, ils Grischuns e las Grischunas han però prioritad.

Ina massa annunzias

Adrian Luzi declera che la reclama funcziun surtut sur propaganda a bucca. «Per part eran già ils geniturs qua u che persunas d'instrucziun motiveschan lur scolars e scolaras», raquinta el. La reclama para d'avair in bun effect. Il curs ha mintgamai 120 fin 130 annunzias, ma mo 86 pon vegnir resguardadas pervia da las capacitads restrenschidas da l'infrastructura. Uschia n'èsi era betg pussaivel da sa participar durant duas stads.

Tuttina na sa participeschan betg tuts e tuttas da libra veglia, mabain per part plitost sin giavisch dals geniturs. Plinavant pon tschintg emnas esser in temp vaira lung. Ils blers chattian però svelts amis ed amias, manegia *Adrian Luzi*. «Els/ellas bragian cura ch'i vegnan e cura ch'i van», ri la scolasta *Astrid Alexandre*.

«Nus essan leds che nus n'avain già nagin cas da corona», di *Adrian Luzi*. Pervia da tests regulars na ston ins purtar naginas mascras durant la scolaziun, quai ch'engrevgiass l'instrucziun.

Episodas divertentas durant l'instrucziun

Grazia al curs èn ils giuvenils e las giuvenilas a la fin da la stad in onn d'instrucziun tudestga ordavant a lur conscolars e conscolaras. Las 105 lecziuns linguistics vegnan anc cumpletadas d'instrucziuns tematicas. Rient sa rimna ina gruppa da scolars e scolaras quel di giadora en in rudè. Il tema è: «Acziun e reacziun». Uschia emprendan ils giuvenils e las giuvenilas pia perfin in zic fisica durant la stad.

«Il nivel è fitg different: Cun intgins/as pon ins già avair ina conversaziun cura ch'els arriivan, entant ch'auters/as na chapeschan anc betg pled», manegia *Astrid Alexandre*. Tenor lur nivel vegnan ils scolars e las scolaras partids/as en en ina da las set classes. Il curs saja adattà per imprendere ordavant u per emplenir largias. «Savens sa dattan legras situaziuns durant l'instrucziun» raquinta *Jann Duri Bantli*, ch'è già per la 10avla giada là sco scolast. Blers/as scolars e scolaras dumondian a l'entschatta sch'els/ellas possian ir «in die Toilette», pervia da la formulaziun taliana «andare in bagno».

Dus scolars interrompan il discurs perquai ch'els ans vulan preschentar in drama d'amur ch'els han exercità. «Ich liebe dich!... Ich dich nicht!», excloman els, durant ch'els passan si e giu e chaschunan ina risada tar ils aspectaturs e las aspectaturas.

Pleds preferids

Intgins giuvenils sa participeschan perquai ch'els vulan far il gimnasi u far la maturitad professiunala en ina regiun tudestga. Autras giuvenilas visitan il curs, perquai ch'il tudestg vegn valità sco lingua impurtanta per il futur.

«Jau sun qua per imprendere tudestg da scrittira», raquinta *Mathias Chiesa* che deriva da Ruvigliana e frequenta la quarta classa dal curs. Tras parents sa el già in zic tudestg svizzer. Sia conscolara *Larissa Baldi* da Lostallo manegia ch'ella possia uss scriver pli facilmain. ««Genau ist mein deutsches Lieblingswort», raquinta ella. Era *Matias Chiesa* ha in pled tudestg preferì, numnadamain «Katastrophe». «Lurden en las chombras è era ina catastrofa», ri *Adrian Luzi* sinaquai. *Eva Consoli* da Roveredo che frequenta la segunda classa dal curs raquinta loschamain ch'ella haja uss la survista dals temps grammaticals tudestgs. Ella pudes-



L'instrucziun tematica ha lieu giadora.

FOTOS LAURA SCHÜTZ



Eva Consoli vul forsà frequentar in di la scola chantunala.



Ils scolars e las scolaras lavuran concentradamain vi da lur incumbensas.

sia s'imaginar da frequentar in di la scola chantunala.

Excursiuns ed examens

Il suentermezdi suenter l'instrucziun en scola han ils giuvenils e las giuvenilas temp per in project sco zambregiar u ballape ch'els pon tscherner sez. Per part èn era excursiuns u ocurenzas planisadas, per quel di ina saira da grillar.

La davosa emna è speziala. La festa da finizun e la visita en il «Alpamare» èn ils highlights dal curs. Durant quella emna han però era ils examens «Fit in Deutsch» lieu. Quai è

in test da tudestg da l'institut da Goethe per persunas tranter 10 e 16 onns. Sch'ils giuvenils e las giuvenilas dumognan l'examen, han els/ellas suenter in certificat dal nivel A1 u A2. Quels nivels correspundan als emprims dus dals sis stgalims da cumpetenzas dal rom da referenza europeic per linguas.

Jann Duri Bantli di dentant ch'emprendere tudestg saja mo ina cumponenta dal curs. «Ils giuvenils e las giuvenilas che van mo la fin d'emna a chasa madiran en divers aspects durant la stad», manegia el.

Ils scolars e las scolaras dattan adia e cloman «Auf Wiedersehen!».